

[Augsburg], 9. März 1567

An Johannes Oporinus

UB Basel, Fr. Gr. I 11, fol. 292r.
Steinmann Nr. 782.

S. D. Georgij Tanneri verba. Tzetzis graeca commentaria in priores tres libros Iliados Homeri manuscripta hic apud nos extant, nunquam edita in lucem: quae si typographus praelo mandare vellet, libenter communicarentur. Haec ille. Quod si et historiam illius recuderes, quae a multis desideratur? Literas Selneggeri mitto serius quàm vellet ipse, sed citius ego non potui. Isocratem graecolatinum si nondum accepisti: accipies breui. commentarios mittam Basileam in quibus nunc relegendis versor, adhibito puero anagnoste. Gnomologias et Phraseologias tuo iussu seposui, excudendas, absolutis Isocraticis commentarijs qui vel soli mediocre volumen conficient. In Demosthene etiam et Ciceronianis libellis ἡσύχῳ ποδὶ procedam, quantum licuerit, et paulatim colligam sarcinulas, orans, vt felix siet (!) emigratio nostra: quae si mihi spatium dederit omnes nugas meas ita digerendi vt volo: et hoc in felicitatis parte numerabo. Suffrydum eloquentiam suam in me delectu ex omnibus ostentare voluisse, etsi molestè fero: non tamen cuiusquam iniuria studium meum infringet. Inprimis autem infesti mihi sunt Belgae et Vbij. Iesuitae in catalogum haereticorum me retulerunt: Strazelius olim in me praesentem, ignarus adesse, inbachatus (?) est. Franciscus Fabricius nihil potest in publicum edere sine Wolfij suggillatione. His se nunc socium addit Leonardiensis iste τὸν κολοφῶνα ἐπιθεὶς. Sed per me triumphant illi, magis laudandi, si ediderint meliora. De Nonno nihil impetrabimus ob venditam bibliothecam Fuggeranam: nec Dionysij Cathusiani opusculum reperire licuit. Literas Viennam curaui, Hillero quod voluisti, significaui. D. Zwingerus rectè in patria se continet. Alterius non sit, qui suus esse potest.

D. Cratonis verba.

Ad D. Oporinum scribens, mei memineris. Nam is non solum libros à Cantero commissos, verum etiam Zwingero, mittere oblitus est. Det Noricis, qui ad Doctorem Ioachimum Camerarij F[ilium] perferant. Is rectà ad me transmittere poterit. Idib[us] Februarij.

Cos. Hainzelius S[alutem] tibi dicit, et petit opera Ciceronis a D. Lambino edita, vnà cum rationibus quantum tibi debeat. Plura quae scribam non habeo, plura à te expecto, sed per ocium et commodo tuo. In primis autem, an graecolatinum Isocratem sartum tectum à Willerianis acceperis. Vale et bene rem gerito. 9 Martij 1567.

Hiero[nymus] Wolfius T[uus].